

四庫全書

集部

欽定四庫全書

集部

溢水集卷十一至三

詳校官中書臣沈 颺

主事臣呂雲棟覆勘

覆校官中書臣呂雲棟

校對官助教臣汪錫魁

謄錄監生臣黃佑

謄錄監生臣謝景標

欽定四庫全書

淦水集卷十一

金 趙秉文 撰

碑文

梁公墓銘

大定中朝廷清明四夷賓服上方儲思於穆清講明乎
蒐狩之制車駕頻年幸金蓮川公以薛王府掾抗章論
列以為其地在重山之陁積陰之所春燠不毛夏暑仍
續殆非所以頤養聖躬也况蕃部野心難制萬騎撒烈

信宿可到萬一戒嚴之際奔突而前卒何以禦至引梁武招納叛亡以為先事之戒書奏縉紳危之上曰此愛我也庸何傷詔為止行自是名聞天下家寘一通言正人必曰梁公矣其後公在陝西上平賦書累數千言其大略言大定四年行通檢法是時河南陝西徐海以南屢經兵革人稀地廣蒿萊滿野則物力少稅賦輕此古所謂寬鄉也中都河北河東山東久被撫寧人稠地窄寸土悉墾則物力多稅賦重此古所謂狹鄉也寬狹鄉

之地至有水陸肥瘠一等物力相懸不啻數十倍後雖
三經通推並依舊額臣恐瓶罍之詩不獨譏于古矣書
奏上深嘉嘆命藏有司將用之初公言蕃部叛服不常
其後果爾及平賦之令未下而宋賊繹騷督賦者病焉
識者服其有先見之明竊嘗謂士之出處惟觀立朝大
節其他可畧也如公以外官散地已能建白如此使之
居侍從之列必有大過人者此予所以銘公而不愧也
公諱襄字公贊絳州正平人第進士仕至保大軍節度

使云銘曰

於皇世宗	百度惟真	世平講武	駕言涼嶺
言言梁公	獨以諫鳴	儆戒无虞	屢省乃成
謂天盖高	胡動以誠	帝曰愛我	詔梃其行
薄海内外	聞公直聲	匪唯公直	繇天子明
平賦一書	時其重輕	世有主父	不孤賈生
沈史飢經	擥華摘英	浩浩而博	涵涵而渟
小試所長	風馳霆驚	名聞天朝	不登公卿

惟皇好直 錫之胄榮 尚詒來者 視予此銘

郭公碣銘

君諱某字某某郡人宋宣和中族子以高賢聞欲因權
要以貴公公曰請託公行晉所以亡也此言何為至於
我哉未幾宋果亂入皇朝第進士仕至某以某年卒嘗
試論之人之壽夭窮達繫于天而其子孫之賢不肖與
其世數之遠近則係乎其所積之有厚薄予於見聞
間以陰德有後者得三人焉若王寶文守洺有德于洺

人而以橫逆被禍其子舉士君彥潛以進士甲科文學
名于世賈廸功稱為遺直而其子戶部尚書執剛以政
事聞于時而君以慈仁孝友輕財樂施位不滿德而轉
運使公富貴而好德康寧而壽考以忠果彊敏聞于天
下天之報施善人果何如也乃為之銘銘曰
不能銳是以鈍於試以昌其世世

崔公墓銘

君諱憲字子真涿郡良鄉人世系載先塋幢事業載壙

銘先生賦中庸之正性抱醇懿之休德不沽激以忤物
不苟合以趨時淹貫六籍兼綜羣藝循循焉彬彬焉善
誘善導可謂淑人君子者矣故能學為人師行為世表
慈祥孝友篤密愷悌人無得而稱焉然天下學士大夫
言善人必曰子真云其醇而不耀陳仲弓黃叔度之流
乎無何稟命不融以大定二十九年卒於官春秋五十
有二官止於孝義縣丞嗚呼惜哉先生一第進士甲選
以誤黜再上復中乙選之才之邵猶以行掩之也與同

邑劉器博翟瑜以道義相友善門人前左司郎中劉昂
等僉以有道無命石有誤述勒銘斯表用旌不朽銘曰
元氣氤氲降為仁人含和韞真不緇不磷
介然而石溫然而春聲滿天下祿才及身
青雲諸生滿其後塵勒銘貞石垂聲不泯
姬平叔墓表

泰和八年冬十有一月丙辰盤安軍節度副使姬公平
叔以疾卒於泰州官署之正寢何以書皇朝忠清行義

之臣也盡瘁王事故書爵曰字貴之也禮男子不死於婦人之手卒於寢正也今天子嗣位首詔公赴闕將用矣而公已歿隱之深故謹而日之也退而哭哭而誄曰梁木其摧乎正人其萎乎微夫子吾誰歸乎自孔孟之歿幾二千年士大夫以種學積文為進取之計幹辦者稱良吏趨時者為通賢而不知治心養性之術間有明仁義之實以通經學古為高救時行道為賢者必怪怒罵笑以為狂愚世之知平叔者見其卓絕之行忠義之

節臨窮達處禍福無愧於古君子或以為勉強自苦或
以為蔽窒不通孰知平叔之賢凡以知道故也世人之
所以不食鴆毒者以其殺人孰知酒色之害烈于鴆毒
而不知避知之不審耳生固我所欲有甚于生者理義
是也死固我所惡有重于死者喪其本心也大哉心乎
修之可以為賢哲養之可以塞天地人知養其身而不
知養其心亦惑矣公嘗語人曰凡聲色勢利之屬皆客
氣也人能無以客氣害其良心斯幾矣故余以為知道

公之鼻祖因官受氏奕世載德不忝前人戰國齊大夫樓漢南陽太守資唐宰相楚客之耳孫宋諫議度大理丞若谷之雲來處士尚賢之玄寶臣之曾公壽之初傑之子也避簡肅皇帝廟諱改氏曰姬汝陽人諱端修字伯正一字平叔與人交怡聲下氣恂恂若無能至臨大事遇大患雖顛崙盛不吾壓也此一反生平不喜讀佛道書拳拳如奉戒律寡言笑不飲酒屏絕聲色年四十餘喪其配遂不復娶終身無媵妾此二反家素殷羨未

嘗有綺繡之奉鐘鼎之食視一物若靳惜至田宅之券盡推以與其姪輩而弗子曰吾先兄之所積也此三反嘗謂人曰吾有三必一第不足道既第必樹名節年六十必致仕人始未之信既而中大定二十五年進士第調唐州司候太守子不法攝寘于獄守怒不為屈改輩州通西令以廉外同州觀察判官遷洪洞令補尚書省掾以稱職擢監察御史首彈張復亨才勝德小人也朝廷以小人居諫職可乎又與拾遺張嘉貞奔走權貴皆

不宜進用又言樞密大軍至盧車河敵勢窮蹙不即勦絕至有臨潢之敗其餘將帥多非其人因薦同判樞密完顏老同知臨潢紇右烈按出虎等沉勇有謀可任方面知濟南府張萬公北京留守完顏承暉戶部尚書范楫秉志公方可任廟廟其後凡三上書皆言善善當必用惡惡當必去在斷之不疑耳上問其狀曰臺官近日言復亨承暉尚未行也上亮其直然姦人自是側目矣竟為有司傳致其罪上特宥之改大學博士未幾出為

彰德府判官秩滿除大理司直轉寺丞上召見宣諭備至會命省讀應詔陳言文字得唐括合達一書上之曰時政得失盡於此矣其造次不忘悟君如此是時輦轂不雨久繫窳滯議坐主者罪反為所擠奪一官歲餘授知盤安軍節度副使俄規措東北路軍儲臨終嘆曰天不假吾數月壽以畢幅巾之願邪享年五十有九配陳氏二子懋應公仕章宗朝不為不知遇賴聖恩全宥亦衆矣其卒葬月日攀龍髯以遡箕尾似非偶然者而道

終不克大施於天下既而身愈斥氣愈不衰名愈重天下士大夫識與不識言正人必曰平叔公嘗奏對以君子小人為言上遣近侍局使李仁惠問小人為誰以仁惠對上聞之愕然及公歿而仁惠敗天下哀其忠云復繫之辭曰

剛為天德	無是餒焉	物或蔽之	人而不天
復情於性	守動以靜	不戒而剛	無欲以正
惟伯正父	學先致知	非苟知之	亦信蹈之

公材小試

于憲于丞

羣瘡側耳

丹邱鳳鳴

投膠于河

幾何能清

砥柱屹然

頽波不驚

公命不延

不登柱石

公在廊廟

孰為蟲賊

公能抵之

不能已之

嗚呼九原

愛莫起之

交交黃鳥

爰止于棘

天不憖遺

哀何有極

老聃言壽

死而不亡

一時之促

萬世之長

汝山蒼蒼

汝水逶遲

公今不死

公墓有碑

遺安先生言行碣

先生姓王氏諱礪字逸賓其先臨洺人先生實生於汴
梁嘗以洺川自稱不忘本也自幼穎悟絕羣外頗如也
初學詩於伯父震落筆驚人震自以為不及未幾詩名
大振加之孝于親友于弟誠于人篤於已遠近論大行
必曰王逸賓矣初孟公宗獻友之張公壁叔獻趙公颯
文孺皆師尊之先生天性謙至待之反若居已上及數
公相繼魁天下直玉堂然後先生之道益尊名益重朝
賢兩薦名德先生以書抵故人之位清要者苦以親老

為辭議遂寢明昌末聖天子詔舉德行才能之士鄉人
耆德諸生五百餘人薦先生孝義忠信文章為世師表
朝廷以素知名特賜同進士授亳州鹿邑主簿先生年
幾七十矣以目苦昏暗即日移文有司以老疾乞致仕
朝廷猶以半俸優之首葺先塋次以分惠親舊計月而
盡泰和三年八月二十有七日以疾終于家臨終神色
不變戒其子棺周于身足矣語畢而逝葬于祥符縣魏
陵鄉蕭氏之園先生教人先行後文與人交終始不易

居喪齋蔬衰服不去身二年與二弟同居終身無間言
平居循循醇謹視若無能為至不義矯如也其詩冲淡
簡潔似韋蘇嘲戲風月一言不及也所與游皆世知名
士若文商伯起張公葯元石及其子觀彥國王琢景文
師柘無忌鄴權元興高公振特夫王世賞彥功王伯溫
和父左容無擇游道人宗之路鐸宣叔右丞唐括文正
公鎮南都以禮致之不能屈及與貧士談饑坐終日不
知誰為主誰為客也嘗冬日詣一親知家會坐客滿主

人貧窶為代給所須坐客疑其寒色物色所得乃典綿衣以贈也葬其母鄉鄰或賻以布帛拜而受之異日復歸其人曰吾親安吾貧賤不可受也其廉介類此其真純之德卓絕之才淵深之學廉正之操黃叔度陶淵明元紫芝司空表聖之徒歟以秉文明昌間遷河南轉運幕過相謁坡軒居士鄺元興居士曰君知王逸賓乎斯人當今顏子也君不可不掃門求見之既見曰鄺公知人矣自是之後虛往實歸及其重來墓木已拱嗚呼使

子雲見之不當絕嘆于李仲元蘇元明見之不當見稱于元子不意千古之下復有斯人乃伐石樹碣用旌不朽銘曰

居今而行古身晦而名彰不獨以詩昌倚

東明令王君雞澤尉楊君死節銘

貞祐元年秋九月北兵至河朔東明令王毅之剛雞澤尉楊君過叔黨死之詔褒贈有差嘗謂士大夫高爵厚祿平居左繩右準以功名自許一旦仗節死義顧出于

簿領之卑彼區區一令尉乃能樹立如此庸詎知名為
主知罷光身後也哉誠義激于忠不忍偷一己之安而
驚百姓之患非剛明者能之乎銘曰

邊臣失機 竟速抵巇 來亦不麾 去亦不追
坐視穴罅 反棄其師 令尉之卑 而能死之
噫

張文正公碑

貞祐三年冬十二月十六日翰林學士承旨張公以疾

薨于正寢訃聞上為輟朝命勅祭勅葬贈銀青光祿大夫謚曰文正前代謚文正者不過三數人本朝惟唐祐丞相與公而已嗚呼亦可謂榮矣初明昌泰和間明天子勵精政事修飾治具典章文物高出近古公之父清獻公任奉常春官朝廷典憲皆其討定修國朝儀禮完然為一代法其後公繼之前平垂三十年凡朝廷有大制度大典冊大號令至于紀世宗顯宗章宗三朝之閔休偉烈未嘗不經公之手初宋人寇邊南鄙用兵書詔

旁午公獨任其責沛然有餘朝廷以平章政事僕散揆
軍田石副元帥完顏匡等圍襄陽又賊帥丘密遣人告
和或議乞以恩旨許將士回俘掠公言君人者與為將
帥不同君道以仁義為主弔民伐罪而已將在閫外權
其事宜可也借如軍士應須俘畧與其出自上命不若
出于帥臣之為愈也其論襄陽可攻圍與否及欲分淮
南之半為界公言向者大舉本期平蕩江漢今平章軍
回竊意在彼事勢或有未得如吾意者但隨所得郡縣

撫而有之彼必以我為圖久駐之計方事進取震懾畏
亡求成不暇矣不必以淮南遠近為斷其後張巖書來
以朝廷所須五事但欲量增歲幣歸泗州俘略朝議以
面奉聖旨必以割地稱臣使得贖罪為辭公又言有司
之事容可擬議至于聖訓理難中止大定初蓋度偽宋
必能遵稟故令帥府開示聖訓報諭今既聖度包荒竊
恐宋人以要約重難急于求請不若使其易從然後示
之聖訓重以生靈之故曲依來請庶幾兵革早息其後

以叔易伯重增歲幣函賊臣之首獻擣軍之賞公在翰
苑籌畫為多南邊底定固賴明天子與大臣協謀蓋亦
有內相之助焉初清獻公由禮部郎中出守林棣代為
郎中及以尚書遷亞相公復為侍郎及清獻公致政之
後公又有御史之拜衣冠傳為榮事故其誥命有鄭之
桓公代為周司徒韋之賢成繼作漢丞相之語公之歿
朝廷以公家傳禮學復命其弟行信為禮部尚書自非
學問該博議論薦正而濟之以深醇之行勤敏之撝何

以有此公諱行簡字敬甫莒州日照人祖莘卿以醇儒
碩學顯名當世仕至鎮西軍節度副使父暉經明行修
嘗任御史大夫公定十九年擢詞賦進士第一時年二
十四云云公性純厚端慤謹慎周密口無擇言而為善
不近名修道不求容惟以公勤忠實自結人主之知是
以歷仕累朝俱蒙寵遇平生少交遊寡言笑常以謙敬
自持待人以誠而與物無忤故薨之日朝士大夫哭之
哀焉曰世不復有斯人也云云其家風醇謹則似萬石

君通達典故似虞秘書經學論議似孫宣公誥詔典冊
似李贄黃人得其一已獨厭餘不幾于全乎云銘曰

天地元醇 降為仁人 含和韞真 不緇不磷

行為世表 文演帝綸 家傳禮學 載筆終身

敢有二事 墜其清芬 歷事四朝 寵數益新

何以致之 惟敬與勤 緇衣美鄭 德星聚陳

顧後絕配 瞻前無隣 惟清獻公 如萬石君

歲時問勞 寢膳以聞 慶建白首 朝服事親

明星忽逝 孤月獨晨 永懷道陵 鼎湖上賓

金鸞舊夢 玉樓新文 忠厚之氣 歿為明神

公薨汴陽 而葬南原 過者必式 惟文正之墳

任子山壙銘

予嘗恠太史公傳扁鵲倉公行事并載其治法之詳如此而王公大人功業無聞者畧而不及一言何也既而歎曰此後世作史冗長無法徒為紛紛而太史之書言簡而事核獨為良史之法者也有一人之人有百人千

萬人之一人有百世一人有千萬世之一人之二人亘
千百世千萬人之一人者非耶可方以其技使無聞也
哉漢書不傳張仲景唐書不傳王冰識者尚有遺恨其
偶遺之耶抑削而不錄之耶賴其遺書傳於後世使其
書併亡則治人之功無乃闕耶此予所以銘公而不辭
也公諱履真子山其字也以醫聞許州長葛人銘曰
不緇而僧 不官而儒 顧以醫鳴 不求贏餘
其四休居士之徒與

翰林學士承旨文獻黨公碑

先秦古文篆籀淳古簡嚴後世邈乎不可及已漢之文章溫淳深厚如折枯繇以為明堂之楹駕騶驥以遵五達之衢不憂傾覆使人曉然知治道之歸韓文公之文汪洋大肆如長江大河渾浩運轉不見涯涘使人睊然不敢睨視歐陽公之文如春風和氣鼓舞動蕩了無痕迹使讀之疊疊不厭凡此皆文章正也至于書亦然秦相李監之篆漢魏之八分虞褚魯公之楷見者莫不歛

衽而敬其下作者如零珠片玉非無可喜要非書法之
止也本朝百餘年間以文章見稱者皇統間宇文公大
定間無可蔡公明昌間則黨公於時趙黃山王黃華俱
以詩翰名世至論得古人之正脉者猶以公為稱首公
諱懷英字世傑秦安州奉符人十一世祖宋太尉進公
少穎悟日誦千餘言及壯以文名天下取東府魁大定
十年中進士優等調城陽軍事判官遷汝陰令十八年
充史館編修應奉翰林文字翰林修撰翰林待制明昌

元年遷直學士六年預修世宗實錄及遼史改翰林學士承安二年出知兗州泰定軍節度使為政寬簡不嚴而人自服化三年入為翰林學士承旨致仕大安二年九月以壽終享年七十有八是夕有大星隕于家居之階上衆視之公已逝矣官至中大夫公性寬和容衆犯而不校未第之時樂山水不以世務撓懷簞瓢屢空晏如也夫人石氏徂徠先生之後亦能安貧守分母始娠夢唐道士吳筠來託宿既而公始生及長儀觀偉異若

仙然其文章字畫蓋天性儒道釋諸子百家之說乃至
圖緯篆籀之學無不淹貫文似歐陽公不為尖新奇險
之語詩似陶謝奄有魏晉篆籀入神李陽冰之後一人
而已嘗謂唐人韓蔡不通字學八分自篆籀中來故公
書上軋鍾蔡其下不論也小楷如虞褚亦當為中朝第
一書法以魯公為正柳誠懸以下不論也古人名一藝
公獨兼之亦可謂全矣銘曰

文章非能為之為工乃不能不為之為工也非要之

必奇要之不得不然之為奇也譬如山水之狀煙雲
之姿風鼓石激然後千變萬化不可端倪此先生之
文與先生之詩也至于篆籀之妙後數百歲復有一
陽冰則不可知後數百歲無復一陽冰則書止於斯
噫

澄水集卷十一

欽定四庫全書

淞水集卷十二

金趙秉文撰

碑文

史少中碑

始余聞季宏父名於相知間行高而學博能文翰善談
論下至博奕亦絕人遠甚及來京師始識之溫厚謙冲
殆過所聞其問學愈叩而愈無窮與人交愈久而愈不
厭自趙黃山王黃華諸公皆屈已尊禮之又與其婿陝

西東路轉運使龐鑄才卿有水玉之譽觀其為人與所
交遊其家世可知矣李宏又嘗語其兄雋能詩泊山東
詩人王願養道為唱和友獨恨晚生不及陪奉其先大
夫杖履意必有名儒鉅公發其事業第未之見也一日
李宏悵然曰先大夫之才之行不減古人鄉先生張晦
嘗誌其墓矣崇慶二年公奕任太常丞命子婿龐鑄狀
其行求翰林學士承旨前禮部尚書張文正公為之碑
文未成秋八月公奕改簽山東東路按察司事無何中

原受兵大河之北莽為盜區鑾輿巡幸陪都百官奔走
危從既而文正公泊龐鑄相次下世求遺文於其家俱
無有也公奕亦遭益都之喪亂孑身渡河生平所藏書
掃地無餘公奕不幸早孤族中老人又皆物故是以無
能道先君行事者姑以舊聞麤記十一恐遂泯滅無傳
惟是窀穸之事所以託不朽者惟子是在敢以為請某
與李宏同僚也其敢以不敏辭謹次而銘之公史氏諱
良臣字舜卿其先洛陽人石晉鄭王之後曾大臨祖士

元皆隱德不仕父淵徙大名鄉人稱善人力教公讀書
後以公貴贈儒林郎母太夫人蔣氏魏之甲族也儒林
君既歿躬教以義方公亦卓然自立文學富贍大名李
益名臣之冑館寘公于門下年二十四登宣和六年第
調主成安簿俄丁太夫人憂哀毀過禮會宋滅皇朝撫
定河朔安撫司辟舉監北京內東倉遷冀州南宮令涇
州觀察推官德順州節度掌書記京兆涇陽令河南新
安令滄州節度判官後歷清豐濮陽大名三縣令耀州

三白渠規措以長子公雋之亡也尋鑿東歸世宗即位
復為南樂平陰二縣令潞州觀察判官年六十九卒于
官大定八年八月也先娶大名俞氏一男曰公雋妙齡
秀發有聲塲屋間詩筆妙絕年二十八無祿早世再娶
德順毛氏親衛大夫惠州團練使緯之女賢而有家法
二男公彪公奕四女適毛瑊賈錫任祚梁俱公彪武節
將軍淇上埽巡河公奕太中大夫翰林修撰公在新安
時李成帥河南豪縱不法上下莫敢忤其意一日人持

府檄及囊封至縣封有河南印章及成手迹曰府主須
金如囊封之重縣吏股慄惟命是從公獨笑之命啓其
封吏皆叩頭曰事若實則吏俱死無為也公卒令開之
果盡石也其詐乃得居平陰日縣豪民王八十者時持
吏短長為一邑之害小不如意陰以法中之縣官熟視
不敢誰何公至召之庭中訓以義理遂感泣改節卒為
善人晚節居潞州上黨一愚民以財雄一方率數村之
民幾千人迎西齊王以賽秋社儀衛之物頗僭制度利

其財者構成其罪縣獄具聞于州州將武弁有覬覦之心欲盡誅之公獨慷慨別白其事州將不能奪竟全千人之命公仕宦四十餘年陸沉下僚心安氣和無不遇之歎及其亡也夫人毛氏護喪歸葬于大名縣先塋之側禮也累官至中散大夫以子貴贈少中大夫開國伯在鄉里顏色溫然似不能言者及臨事毅然有執其孝友之誠蓋天性然自太夫人之亡家有二寡姊事之如母其月入之廩盡以二姊主之夫人不與也與二兄居

聚族三百指衣食之如一其用廢也先其姪公明其仁于親族乃如此是宜銘銘曰

沈之水出為濟經濁河不變其泚公之仕當宋之季流離亂朝清而不滓如卓密縣過建武則起名聞天下乃一令耳才德如彼位止如此不亡者存在其子

張左丞碑

大定明昌間朝廷清明天下無事上方留意稽古禮文之事於是御史大夫清獻張公釐正國朝儀禮成一代

大典潤色太平皇矣唐矣然猶削牘大小九十餘奏若
諫田獵巡幸節財用慎法令明德運之非古辨正統之
無定議提刑不可罷者三章救監察姬端修不可治罪
者累奏其餘隨事諍諫殆無虛月其言明且清正而通
維魏鄭公展盡底蘊陸宣公不負所學未能遠過也其
長子翰林學士承旨文正以高文大冊佐佑章宗泰和
南征書詔旁午獨當大半以至函賊臣之首獻犒軍之
賞量增歲幣易叔以伯雖聖謀經畧授之成筭蓋亦有

內相之助焉公其仲子也崇慶二年公任諫議東海侯將復召用呼沙呼叅議軍事公奏言呼沙呼為人遠近之人戶知之前知大興府事專任私意枉害良民蔑視省部以示強梁媚結近習以圖稱譽及為山西將帥持師無律民數被害徒能取蔚州官帑殺涑州縣令而已一朝遇敵引數十騎先遁朝廷踰年廢而不用衆庶莫不喜悅今若復用惟恐蠹國害民更甚前日一將之用安危繫焉既寢而不用矣至寧元年夏六月公又奏言

朝廷欲起舊臣俾為元帥請以近事明之內刺之為留
守外刺之為元帥非不老且舊也而不能全遼東之敗
一文士一劇賊而能保山西于屢戰人材能否不問新
舊明矣譬如治病一醫不効必更求醫多方療之今止
用前日之敗將禦前日之勍敵求其成效亦難矣且呼
沙呼為人殘忍其相貌凶悖莫測利害之機况有大子
此者書奏不從至八月二十四日呼沙呼以兵圍宮禁
果有弑逆之禍信哉不明乎春秋之義者前有讒而不

見後有賊而不知春秋書輦帥師削其公子以不義強
君著履霜之漸是以及鐘巫之禍也呼沙呼跋扈專制
盖有漸矣而終不悟哀哉然而知之非難言之難言之
非難聽之又其難也言之于未然之前則不信言之于
已然之後則無及此天下所以多公先見之明而公亦
不忍天下之被其禍也迨宣宗即位公首奏言乞正賞
刑以順人心乃者羣臣言東海侯不當立鄴陽石古乃
死之非義此誠有違經旨不合人心春秋之法國君雖

立不以正但嘗與隣國會盟列為諸侯所以正君臣之分也東海在位六年矣為臣子者豈容他議呼沙呼躬行弑逆當此之時鄆陽石古乃領步兵五百赴援力戰而死忠義顯然今反以為邪黨恐非公議宜先褒顯優贈官爵以勸忠義此賞之所宜先也呼沙呼雖有援立之功然聚兵專命侵奪主威皆非人臣所為况以臣弑君不可以訓昔宋徐羨之傳亮弑營陽王立文帝文帝下詔暴羨之等罪誅之以迎奉之誠免其妻子徙之建

安今呼沙呼雖死罪名未正宜令有司暴其辜惡除名
削爵籍沒家產妻子雖合緣坐乞依宋文故事免其妻
子徙之遠方此刑之不可不正也上以方安反側未遑
也事雖未行公之所言正也春秋魯隱公不書即位攝
也及其薨不書葬君弑而臣不討以為無臣子正其罪
可也桓公弑公子糾召忽死之孔子不以加貶况即位
踰年得成為君者乎死之宜矣傳曰公家之利知無不
為忠也送往事居耦俱無猜貞也公知無不言可不謂

忠乎引經據正可不謂貞乎此予所以銘公而不愧也公諱
某字信夫莒州日照人世業載清獻公文正公碑第進士
公之任諫諍也宣宗命尚書省集百官議衛紹王名稱先
是呼沙呼勝于廟堂宜降為庶人公與兄行簡引昌邑海
西故事宜降為王呼沙呼啣之不屑也又劾內族訛可以
軍敗乞問狀及補外引見言左叅政鄂屯雅格飾詐不忠
臨事慘刻黨呼沙呼乞賜罷其在涇也上封事言賊犯鎮
戎女魯歡怯敵不救朝廷遣使臣賞邊功多受銀馬饋遺

非朝廷體舉廊帥哈達可任大帥自是權貴側目矣其餘
隨事証救多此之類初公叅大政也適高琪攬權醜正惡
不附已者衣冠之士動遭窘辱公引大平舊制力抵其非
及其大定勅旨省掾等不得叅注吏貲上為動容會同列
激之由是補外聖上即位驛召超授尚書左丞首言先帝
初即位詔天下刑不上大夫治以廉恥丞相高琪奏定職
官犯臯的決百餘條乞依舊制或謂公首蒙聖主擢用雖
有所建明多不契上旨何也竊謂此乃吾君之所以聖也

昔漢明帝聰斷精明而章帝濟以寬厚明帝不失為明
君而章帝亦稱至孝其與霍光之輔昭帝相去遠矣方
西北鄙用兵高琪奏行一切之政權也及聖主即位公
奏罷之宜矣然宰相藏諸用使斯人由而不知而吾君
亦昭昭然務為新政之動人耳目哉聖主之德天也天
何言哉伏觀聖主即位以來未嘗命一詔獄辱一朝士
則公之所奏已略施行矣何更為哉既謝事與今致政
左丞侯公日以棊酒自適然憂國之心時形于辭色以

正大八年二月八日薨享年六十有九是月葬于開封
縣仁壽鄉西原夫人劉氏封郡公夫人先公卒子節筦
著仕筴未仕俱早卒官前尚書省掾小德尚幼女長適
李肯構早卒次適襲封衍聖公孔元措次適白水令敬
鉉孫仁達仁榮仁表公性純正無城府每奏事上前旁
人為動色公處之坦如也初遊嵩少目之曰吾意欲主
此山果終于此異哉公三職轉運按察司使歷戶禮部
貳刺開通鎮涇邠鄜所至有聲不書姑錄其立朝大節

云銘曰

楊踵賜彪 石傳建慶 奕世載德 維公景行

何以治身 曰誠與敬 何以事君 曰忠與正

進退由義 得失委命 公自筮仕 勇於敢為

利害不問 夷險不辭 上前論事 洞達無疑

觀者縮頸 公獨色怡 王氏世權 祿山逆相

公折其萌 九齡劉向 孫弘飾詐 梁冀跋扈

公斥其非 汲黯李固 徐傳既誅 巡遠未旌

公于此時 請正賞刑 身雖在外 心在帝室

惓惓納忠 以匡時失 帝曰疇咨 汝復相予

君房入相 奏寬大書 懸車告老 隻童匹馬

二老相從 綠野林下 一日不見 死生遂分

壁水明月 嵩山白雲 神耶僊耶 則不可知

有不沒者 視予此碑

故葉令劉君遺愛碑

吾友翰林修撰王君從之有言君子有惠政而無異政

史傳循吏而不傳能吏吾嘗誦之云耳如吾葉令劉君
既有惠政又以才幹稱可不謂全乎君諱從益字雲卿
蔚之渾源人南山翁之曾孫也第進士任監察御史曰
知無不言與當途者辯曲直以罪去天子憐其才起為
葉令下車修學講義聳善抑惡一之曰勵而教之二之
曰惠而安之姦吏惡少望風革面君曰未也事有大于
此者葉劇邑也路當要衝歲入七萬餘石自擾攘之後
歲減三之一田不毛者千七百頃而賦仍舊可乎請於

大司農減二萬石民賴以濟流民自歸者數千未幾被
召百姓詣省請留不果授應奉翰林文字踰月以疾卒
遺民聞之以端午罷酒樂為位而哭越明年使李道人
來乞銘嗚呼非君之才之美之惠曷能使民既去而挽
留既歿而不忘繼之以泣也哉乃為詞以招之命曰悼
騷以慰父老之思其詞曰皇天賦予若人兮鍾南山之
粹靈紛吾既有此淑質兮又申之以修能擷六藝之英
華兮襲六桂之芳馨我予冠之豸如兮胡獨罹此謫也

飛予舄之鳬如今胡遽去此邑蘭秀而摧兮玉貞而折也
倚才之富兮胡壽之嗇也噫嘻將騎箕尾上比列星乎
抑乘白鶴下顧遺民乎將為景星鳳凰以瑞斯世乎抑
為祥風甘雨以濟斯人乎維此葉邑君之桐鄉魂兮歸
來無去故鄉些復銘其墓曰

維南山翁之曾孫以剛直聞百未一見槁死空墳二
子祁既秀而文將大其門邪噫

廣平郡王完顏公碑

太古之氣鍾長白山鴻淪幽紛為聖為賢蘊蘊隆隆儲
為皇風權輿帝墳自我聖朝始制文字以代刻木之政
伏羲氏所以造書契立人極也厥亦惟我世相肇基王
迹太祖太宗肅將天威燹伐遼宋用集大命于厥躬軒
轅氏所以開帝圖也天降時雨山川出雲天佑大邦是
生賢佐故其人物沉勇剛決光明魁傑勩功帝籍圖形
麟閣者不可勝紀其在熙宗時則有若遼王以至公定
冊周公所以相成王也其在世宗章宗時則有若淄王

正色立朝有霍光擁昭立宣之功焉忠義自將代不乏人誰其繼之則我廣平郡王其人矣真祐二年王以都元帥行省事於中都左丞彖多副之委以軍事王鎮以德量總大綱而已既而援兵不至糧運既竭慨然約彖多以同死社稷而彖多有異議竊欲委城而南王面責之愧汗浹背經歷官完顏師姑左丞腹心也數其罪立斬之即起謁家廟召左右司郎中趙思文曰事勢至此吾何面目以見主上惟有一死以報社稷授知管差除

師安石遺奏一通歸達朝廷遂與左右引飲神色自若
頃之仰藥而死嗚呼臨大節而不可奪不濟則繼之以
死古之所謂大臣者歟王諱承暉字維明其先出自景
祖之裔祖鄆王八合父鄭家從海陵南征死之王性淳
一既長志在行其所學世宗朝任近侍局直長諫幸老
廩獵非其地已而果然上悔之章宗朝遷近侍局使隆
慶宮妹天吾藍也得罪先朝上夜召之時宮門已閉王
不受詔上嘉納之興陵復土幄次還常寢王奏宮嬪可

出則出之以遠嫌蓋意有所在也其因事証據類如此
知大興府時閹人李新喜有寵借府之聲妓王卻之京
師大猾爭稻田不直繫之獄走賂宣徽使李仁惠以書
營救即杖殺之衛紹王時駙馬都尉謀烈與其父南平
干預朝權大為姦利王面質其罪其守正不撓又如此
故嘗試論之孔子稱有殺身以成仁無求生以害仁夫
所謂仁者豈特立言踐行循循醇謹而已哉必將有至
誠惻怛憂國之心遇不可必行其志而已也夫以仲由

之果不免為其臣周勃之忠不過為忠臣若漢之汲黯
蕭望之楊震李固杜喬唐之狄仁傑顏真卿段秀實招
之不來麾之不去生以理全死與義合國存與存國亡
與亡斯可謂社稷之臣矣初王留守北京某時為運幕
熟王之為人自以託肺腑之親以劉向抑王氏為忠以
李世勣諛武后為不忠又師司馬光而友蘇軾喜左厲
張萬公張暉與之相友善醉則酣歌伊呂兩襄公詞其
志為何如決非偶然者故獨著其大節而系之以銘銘

曰

維長白山 肇發金源 他山遙尊 精靈氣藹

如彼枝葉 附其本根 其脣維何 鄆王之孫

惟王廣平 奕世載德 父歿王事 勲在王室

帝曰俞哉 績戎世職 敢有不恪 以玷前列

自始之學 勇于必行 剛而無欲 公則生明

蒞官事君 惟敬與誠 力竭股肱 加以忠貞

不畏彊禦 好是正直 力抗黃門 面斥貴戚

平昔喜怒 不形于色 一旦遇患 乃見大節

翠華南渡 留鎮京城 勢窮力蹙 義重身輕

談笑而絕 如顏真卿 王雖云亡 凜凜猶生

一時之酷 萬世之榮 惟帝念功 命秩是旌

配食彝鼎 顏段齊聲 凡百有位 視予此銘

祁忠毅傳

公諱宰字彥輔江淮人宋季以醫術補官王師破汴得
之後隸太醫海陵朝積遷通奉大夫大醫使自以數被

恩遇欲自効會後宮有疾召宰診視既入見即上言諫
南伐其畧言國朝之初祖宗以有道伐無道曾不十年
蕩遼戡宋當此之時上有武元文烈英武之君下有崇
翰崇雄威謀之臣然猶不能混一區宇舉江淮巴蜀之
地以遺宋人況今謀臣猛將異于曩時且宋人無罪師
出無名加以大起徭役首營中都民已罷困興功未幾
復建南京繕治甲兵調發軍旅賦役煩重民心怨嗟此
人事不脩也間者晝星見於北斗熒惑伏於翼軫已歲

自刑害氣在揚州太白未出進兵者敗此天時不順也
舟師水涸舳艫不繼而江湖島渚之間吾雖有士馬之
衆恐無所施是地利不便也言甚激切海陵怒命戮之
於市籍其家產天下哀之強兵以逞誅戮諫臣固天所
以開聖人也越明年世宗即位于遼東四年詔贈公資
德復其田產泰和初詔定大臣謚尚書省掾李秉鈞上
言事有宜緩而急若輕而重者名教是也伏見故贈資
德祁宰以忠言被誅至今天下慕義之士盡傷厥心是

以世宗即位首贈之以官陛下仍錄用其子甚大惠也
雖武王封比干之墓孔子譽夷齊之仁何以異此而有
司拘文以職非三品不在議謚之列臣竊疑之若職至
三品方得請謚當時居高官食厚祿者不為無人皆畏
罪渙忍曾不敢申一喙畫一策以為社稷計卒使立名
死節之士顧出于醫卜之流亦少愧矣臣以謂非常之
人當以非常之禮待之乞詔有司特賜謚以旌其忠斯
亦助名教之一端也制曰可下太常謚曰忠毅鑒師之

職視疾痰謹藥石以決死生可也至於諫諍輔拂不濟則繼之以死此公卿大臣之所難能而公以一身易天下之患功雖不成亦志士仁人之用心噫非烈丈夫疇克臻此贊曰

孔子稱有殺身以成仁如公者可謂近之矣方海陵猜虐自用忍戕其母何有于公而公區區納忠以下廁上卒餌虎口身雖歿而名不朽謚曰忠毅不亦宜乎

淦水集卷十二

欽定四庫全書

淦水集卷十三

金 趙秉文 撰

記

適安堂記

許昌仕君子山作草堂於私第勝之曰適安客過而問所以名堂之意曰子將無適而不安乎抑適意而安之乎子山曰今夫水適則流火適則燔魚鳥之適則翔泳草木之適則條達腰適則忘帶足適則忘履今吾名不

隸于仕版身不列于行伍足不跡于是非之場口不涉
于是非之境未酉而寢過卯而起每興極意會則登臨
山水嘯詠風月玩泉石悅松竹手執周易一卷與佛老
養性之書數冊以適吾性而已吾安馬子其為何如客
曰先生之為適則一其所以為適則異子以嵇康之適
于鍛阮籍之適于酒與夫聖賢之適於道有以異乎苟
以適性為事則斥鷃無羨于天池之樂桀跖無羨于顏
冉之德其於適性一也而靜躁殊塗善惡異趣此向郭

之失晉宋之流所以蕩而忘返者也且夫禮以檢情樂
以導和仁之勝不仁義之勝不義皆非以適性為事苟
以採山釣水為適則忘其君聲色嗜欲為適則忘其親
忘親則不仁忘君則不義不仁不義子安之乎而且奚
適哉子山曰請無以形適而以心適其可乎客曰心迹
一也自心迹之判於是有清狂有白癡皆名教之罪人
而非君子之正也記曰君子素其位而行不顧乎其外
素富貴行乎富貴素貧賤行乎貧賤素患難行乎患難

君子無入而不自得焉古之君子不以外傷內視貧富貴賤死生禍福皆外物也隨所遇而安之無私焉譬之水外之則為雨露霜雪下之則為江河井泉激之斯為波潖之斯為淵千變萬化因物以賦形及其至也推而放諸東海而準推而放諸南西北海而準故君子取平焉斯不亦無適而不安乎子山曰是吾心也請歸而龕諸石客為誰滄陽趙某也

寓樂亭記

河朔之地沃野千里盤盤一都會大行西來大體如一
身蘇門奠其首隆慮據其脊雷首披其胸土門開其腹
恒山枕其足注以橫漳塹以滹沱鐘以大陸其山川風
氣雄深鬱律故其人物魁傑秀異有平原之遺風廉藺
之英骨下逮宋廣平魏文貞皆河朔人傳曰三晉多奇
士其土風之然乎寧晉實趙郡之附庸而吾真定王君
敬之棲棘于此越明年政成乃即城以為亭因隍以為
池引洺水其中植以荷蓮以為士民游觀之地吾友邑

令吳微公妙侔來以記請某曰今夫樵者樂于山漁者樂于水與夫其靜如山其動如川此智仁者之所樂也其所樂同其所以寓者或異嘗試與子登茲亭以四望其亦有得乎無得乎將為仁者靜乎抑為智者動乎其動靜交相養乎其亦動靜兼忘乎不移一席之地而寓妙意于數百里之外皆茲亭之所助也若夫南馳鉅鹿則主父之所困沙邱也北走恒山則簡子之所得寶符也西挹井陘則韓信之所破趙壁也東接冀部則光武

之所以趨信都也自今觀之蓋世力盡化為灰塵忽焉如飛鳥之過空蓋將訪其遺迹但見孤城斷址烟雲草樹而已方其寓世而不知其寓也沉酣于醉夢之場而馳驚於功名之會至于茫然疲溘然盡其亦知有不芒不盡者乎雖然物與我相必無窮而人之生有限山川如舊而四時之風月常新此吾人之所樂也既以寓吾樂且以名其亭

磁州石橋記

北趨天都南走梁宋西通秦晉之郊東馳海岱之會磁
為一要衝溢水西來距城四十里而近又五里東合於
漳方夏秋霖潦碛崖而下漳水洶怒則激流而上匯于
觀魚亭下者三丈有奇吞長堤滅兩溪平時有梁而輿
有舟而方歲利時復波蕩水滴居者病繹騷行者歎滯
留我唯識覺公和尚戚之乃代木以石易脆以堅踵洙
水之制而梁之臨終以命其徒善仙俾鳩厥功仙日而
不笠毳而不褐風經雨營垂四十年僅克有成凡用石

若工以億計觀其締構隆崇巖嵌緻密如山斯屹如月
斯穀力拔地勑勢與空闔忽兮無楹何其壯也廣容兩
軌袤以十丈旁鑿二室以泄水怒下洞九泉以鎮地脉
堊以白灰制以鐵鍵標以華柱護以崇欄物鬼獸怪蹲
伏騰擲變態百出屹若飛動噓可駭也每夕陽西下大
行千里明月東出二川合流徘徊近郊則銅雀之臺西
陵之樹高齊石趙之所睥睨信陵平原之所馳逐山川
興廢森乎目中信天下之雄勝而燕南之偉觀也噫自

有天地便有此川黃軒以來載祀億千天祕神造弗度
沸涓而是橋也蓋經始于世宗龍飛遼東之初而斷手
于聖上鳳集鼓山之年豈前修弗迨將俟昭代而啟人
謀哉非聖人先蒐格靈昭太平之應大雄遺身及物弘
利涉之緣其何以臻茲僕忝鄉梓逖聆頌聲敢銘金石
用昭厥成銘曰

於繹工妙 天造堊設 宵神功兮 杓插駢比
楞平嵌闔 俯穹崇兮 超崖截壑 躡趙跨衛

亘長虹兮 憧憧往來 天下有道 津梁通兮
持斧衣繡 褰幃憑軾 觀民風兮 興琛輦幣
鳥宿衡山 入會同兮 眈眈鼇負 水涵石泐
茲無窮兮

學道齋記

余七歲知讀書十有七舉進士二十有七與吾姬伯正
父同登大定二十五年進士第厥後余調安塞主簿遷
邯鄲唐山令是時年少氣銳急簿書稱賓客舞智以自

私攘名以自尊蓋無非為利之學使其乾沒不已將遂
君子之棄而小人之歸矣而吾伯正父心平氣和以拊
循其下養孤兄弟之子如其所生年四十餘喪其配遂
不復娶若將終身焉及任監察御史危言讜議濱死而
不顧是其果有大過人者泰和二年春相會于京師親
其狀義而不朋窮其心澹然而無所求察其私蓋恥一
物之不得其職是豈真有道者耶他日余問道于伯正
父伯正父曰余何知道余但日食二升米終歲製一緇

袍日且入局了吾職不敢欺賓客慶弔之外課子孫讀書而已余何知道在他人乃尋常日用事而伯正父行之乃有超然不可及者何哉吾儕小人于日用事外所為營營矻矻計較于得失毀譽之間不過為身及妻小計而已而人情之所甚好者伯正父無之酒色人所甚好也伯正父無之綺繡珠玉玩好之物伯正父無之怒氣以待人恃才以陵物伯正父無之非有道者能之乎或者不之信曰今之學者不如是且伯正父所學者何

道也余笑謝曰子去矣有道人梵志者龔著襪嘗曰乍可刺你眼不可隱我脚君當詣彼問之

種德堂記

傳曰十年之計樹之以木百年之計種之以德竊嘗以古驗今為善于家而責報于幽如持印券鑰合取所寄物不在其身則在其子孫又何待百年而已哉今夫日月之明在乎天而所明在乎地寶玉之精在乎山而光被乎草木賢人君子其德在乎身而其榮及其子孫理

固然也其或司命所不識聖哲所難言若管仲之後無
聞而臯陶庭堅之祀忽諸議者猶以為專魚鹽之利而
掌法理之官也善乎東坡先生之論天也曰天可必乎
仁者不必壽賢者不必富天不可必乎賢者必有後天
地之大以無心也何嘗擇善人而賞之惡人而罰之譬
猶一氣之所春一雨之所滋甘苦美惡蕃然並育至其
華者實條者幹霜降木落萬物皆虛而松柏傑然于歲
寒之後其不變者可必也噫天地一圃也萬物一果蓏

也無德而富貴此天地間一巨蠹也物既蟲壞身亦隨之故有鐘鳴鼎食之家鳴玉曳組之後朝為榮華夕為憔悴此種木而不種德者也而閭閻修身之士牛醫馬走之子身都卿相慶流後代譬猶芝蘭茝蕙自託于深林幽谷微風時過見別于蕭艾之中而得登于君子之堂矣此種德而不種木者也今使世之人種德如種木望報如望秋少忍而待善惡之定其責報也亦可必矣然天地之氣鍾于物也不一其蓄之也至精則其發之

也必盡故花之魁異木之秀傑者不常有相如子雲李
白杜陵皆天地精英之氣也故能秀而不能實能蔭而
不能續也其遂也或闕之其涸也或接之故木之再榮
水之涸洑也者亦時有之樂麋之汰而至盈方及者書
之力也張湯之酷而張氏復大者安世力也至于梗楠
豫章其蟠根也既深其流蔭也必大故有七登三事四
世五公再世而為司徒八葉而為宰相者有自來矣豈
不然哉皇朝以來若丞相石公以先德大其家此天下

之所覩聞也其餘田侍郎慙等以直道被誣陷子孫興者十八九此木之再榮水之洄洑者也若趙舉士可王修撰庭筠皆天地精英之氣也至于梗楠豫章蟠根既深流蔭亦大則于公見之矣

云

雖然有一于此富貴

而尊榮康寧而壽考翕翕赫赫聲勢震耀持梁刺肥頤指氣使大官要職親族滿前視天下可欲事無一不如意此人情之所榮而天下之所同而所性不存焉父教子忠子嚴父詔怡怡愉愉令德孝敬其言以廣居室畜

聲妓矜富貴耀世俗為可鄙此人情之所難而公之所獨也所樂不存焉惟宣力皇朝著功生民垂之竹帛傳之子孫者楊公之家傳清白畢公之世篤忠貞此公之所以為榮而天下之士亦有望于公也詩云高山仰止景行行止至于浚其源疏而達之茂其本封而殖之是有待于後之人詩云惟其有之是以似之其是之謂乎

湧雲樓記

大安二年夏四月余來莅平定登城樓而樂之樓枕古

榆關下建十丈旂裘以五筵廣三之二窓闥軒豁俯瞰
閭閻旁引重山複嶺之阻左挹土門右控大鹵大行犄
之羣山迤之道京師而來者歷汾晉接秦隴走雲代商
旅絡繹使驛旁午車摧馬括日不半舍使人目寒而足
慄慄然有去國之悲臯落之山昔陽之泊廣陽之故道
井陘之故關地古天荒巖深樹老使人心折而骨悲黯
然有懷古之思若乃煙容雨態倏忽明晦欄檻半晴野
無完塊雌霓半空雄風千里締綵以清郊塵汗泚秋空

月明飛光皦楹爾屋穿漏我居蓬瀛雪漲千山北風其
寒我續而溫爾縹其單觴於斯詠於斯會賓友於斯其
亦有思乎古之君子內淵覲而外昭曠淵覲則悔吝不
生昭曠則不蔽于物其于居室也亦然窅奧之處淵如
也高明之居曠如也淵靜所以存神昭曠所以知政靜
以養恬動以應物萬變之來了然吾胸中而不惑茲曠
也祇其所以為達也歟

遂初園記

澄水西來枝分屬龍門堰入城溉園田十餘里城之西北隅有園臨先塋往來道與故翰林學士王公子立成趣園相鄰園之地廣脩三十畝有奇竹數千竿花木稱是其北循牆由菜園而入老屋數楹名其莊曰歸愚闕戶而入名其堂曰間間堂之兩翼為讀易思玄之所少南竹栢森翳有亭曰翠真又南花木叢茂有亭曰佇香由竹徑行數十步墻外水聲瀾瀾然流入池中軒之名曰琴筑稍西臨眺西山臺之名曰悠然其東叢書數十

卷蓄琴一張庵曰味真閑閑老人得而樂之老人仰看山俯
聽泉坐卧對松竹此其所以樂也老人非隱者也自量於世
終無補但當謀為蚤退閑居之樂耳加我數年年登六秩一
男三女婚娶都畢乞身南歸為園亭主人斷寘家事勿
相關白曰當如我死也飲酒不至醉不如葷血布衣一
襲糲飯一盂玄易書數冊吟諷終日有客來則接之焚
香宴坐與之眇天地之終始笑夢幻之去來浮雲世事
瞪目不顧每春和體輕駕柴車往來隆慮山中至秋盡

乃歸未知前路能得幾寒暑山中幾往來復消幾量屐耳况朝廷以半俸優我鄉里以親舊待我予何憂哉因名其園曰遂初云

雙溪記

尚書右丞侯領東平之明年買田于黃山之下曰浪溪鄴元注水經所謂狼溪者是也狼與浪同聲因以名之浪溪東二十里而近有佛屋即公之舊隱讀書處也溪源出于此築堰滙水為溪溪廣百畝上納天光下浸山

垠中植亭館蒔以花竹命之曰雲溪溪東西往來有墅
公致政他年營菟裘之地也客過而問焉曰所貴乎士
大夫者謂其得時行道立功名于天下也其在朝廷則
建大政立大議致明主于唐虞之上措天下于泰山之
安其在外則旌旄道前弓矢擁後籌略動鬼神威聲震
山嶽親族賴其庇廕縉紳仰其風采天下賴之為安危
朝廷繫之為輕重此誠士大夫得志之秋也今明公雄
才偉望天瑞聖世向者中土雲擾天馬南飲提孤軍邀

歸騎山東之民釋俘而歸者數十萬衆河朔之民恨不
頂而戴之而明公不以為德蒙聖天子非常之知引置
左右力求補外誓清中原而明公不以為勞擢兼將相
而士論不以為過衣繡還鄉而士論不以為嫌方將掃
大慙佐中興還大駕于舊都挈生靈于壽域雖安石有
東山之志晉公懷綠野之遊恐未可以遂其請也無乃
太早計乎公曰不然功濟生人者雖萬鍾不為泰食浮
于人者雖儋石為有餘今吾魯國一男子耳明天子不

以其不肖擢貳政機大懼無以塞責以速官謗今天子
建中興之功有司各効智力譬猶龍興則雲從而不肖
者自守一溪宜矣聖上一旦哀其不肖賜歸田里太夫
人在堂方將嚴膝下之養歲時伏臘撫桑梓奉甘旨施
于有政是亦不肖者之為政也且君不見此泉乎導之
斯為川緒之斯為淵外之斯為雲泄之斯為雨及其澤
浹雲歸功成如遺是以漠然無累而為往來之氣而此
溪之功不與焉昔柳子厚悔其妄進以愚名溪今予自

託于雲而以名其溪不亦可乎客退而歌曰有浪者溪
其水舒舒君子樂只黃石授書有雲者溪其水淵淵赤
松是遊君子息焉泉出於山雲上于天我公出矣功滿
人間雲出于溪返其舊山我公歸矣復還自然是以有
繡衣兮無以我公歸兮福祿其永綏兮

寶墨堂記

法書不必嗜不必不嗜嗜書近乎僻不嗜近乎隘人不
能無所嗜寧僻毋隘今夫文于天日有圍月有關東龍

西虎南箕北斗雷霆風雨霹歷霜雪砭轟震耀縱橫森
列文于地山錯峙為掌為窠水相薄為淵為洄乍起而
伏欲斷而連崖崩而石泐木腐而蟲蝕似注者似曰者
似口者似鼻者文于人肥瘠長短踣跌戰鬪山有夔水
有罔象恢詭譎怪千態萬狀一接吾前皆吾書之全也
又何待歷秦原經洛汭求之于蒼煙寂莫之濱得之于
敗楮蠹簡之末然後為快哉雖然山石土木之形風雲
月露之狀凡可喜可愕者一旦移之于佔畢之間與夫

商盤周鼓秦銘漢刻橫陳于前及夫崔蔡鍾王歐虞褚陸九原喚起抵掌談笑明窓几如見其人此亦閑中之一樂也夫公平生無所嗜好獨于法書名刻寶之不啻珠玉千金購求必得而後已自公壯時馳驛往來于燕秦齊晉之間聞有石刻雖深山曠澤必命賁藤楮作墨本以歸以是裒金石遺文僅千餘卷兵火散亡幾三之二猶捃拾而不已也暇日築堂于私第榜之曰寶墨竊惟古者有功德則銘之公方以經綸器業光依日月

異日元勲茂德光于竹帛銘于鐘鼎僕雖老矣尚能為公一書再書而屢書之也

希夷先生祠堂記

貞祐四年冬北兵至潼關華陰當其衝雲臺觀鞠為灰燼希夷先生遺像不存正大三年道士某始克棟而宇之會予以使事道華且謂先生之道之行載于史雜見于傳記道家之說昭昭也獨易道出于天至周河圖洛書藏在王府秦漢而下失其傳者十有餘年而先生得

先天之學以象授种徵君以數授李挺之挺之傳邵康
節著以為皇極書周濂溪又以為太極圖而易道復興
顧嘗以謂書可亡也道不可亡也然道待書傳書待人
傳微先生吾誰與歸銘曰

天地有終 易道無窮 後千百世 書可亡耶

仰先生之風 後千百世 書未亡耶

維先生之功猗

葉縣學記

太虛寥廓一氣渾淪日而月之星而辰之噫以雷風竅以山川動靜合散消息盈虛獨陽不生獨陰不成一則神二則化所謂一太極也極中也人受天地之中以生天地能生之不能成之父母能有之不能教之有聖人者出範以中正仁義中天地而立其功與天地並人極立焉自堯舜禹相授受以精一大中之道歷六七聖人至孔子而大備其精則道德性命之說其粗則禮樂刑政經綸君臣父子兄弟夫婦朋友之大經立天下之大

本贊天地之化育其教人始於戒慎恐懼於不見不聞之間其極至于配天地高明博厚其學始于致知格物正心誠意至於治國平天下至道術陰陽名法兵農一本于儒裁其偏而救其失要其歸而會之中本末具備精粗一致無太高難行之論無荒虛怪誕之說聖人得其全賢者得其偏百姓日用而不知天地以此位日月以此明江河以此流萬物以此育故稱夫子與太極合德豈不然耶禮春秋釋菜于先聖先師自京師至郡

邑皆得以時祠孔子而葉劇邑也歷前政數十竟不能
廟而像之茲非闕與劉君從益由監察御史出宰是邑
游必之餘乃先從事于學又率鄉民之秀者日省而月
試之可謂知所務矣凡為殿三楹堂三筵左右廊廡十
有四前三其門旁四其齋下至庫厨咸備而法士興于
學民服其化嗚呼休哉嘗謂人皆有良知良能第未有
以啓之耳願有以葉公好龍之說告之者乎凡士以種
學績文為進退之計而不知治心養性之術入官者以

謹簿書急功利而不知愛民行道之實皆好假龍者也
若亦知夫真龍乎凡天之所以付授我者與聖賢同而
未免為鄉人者利欲蔽之耳人欲日銷天理日明而吾
之心乃天地之心也仁遠乎哉勉之而已昔葉公問孔
子于子路子告之以發憤忘食樂以忘憂聖人尚爾况
吾儕乎

商水縣學記

孟子曰人皆可以為舜孫卿子曰塗之人可以為禹楊

子曰希顏者亦顏之徒舜禹聖人也顏子大賢也而三子者以為衆人可幾不已夸乎夫責馬必曰一日千里則不可苟十駕不輟斯亦千里而已矣責人必曰聞一知十則不可苟服膺不輟斯亦為顏子而已矣雖然顏子何寡也譬之水之性本清泥汨之則渾少焉澄之其清自若也火之性本明烟鬱之則昏迨其煙熄則其明自若也人之性無不善其所以陷溺其心者利欲蔽之耳使吾一旦加澄治之功如水斯清如火斯明不為難

矣然則如之何學以精之使自明之力以行之使自誠之其去古人也不遠矣今之學者則亦異于古之所謂學者矣為士者鉤章棘句駢四儷六以聖道為甚高而不肯學敝精神于蹇淺之習其功反有倍于道學而無用入官者棘功利趨期會以聖道為背時而不足學其勞反有病于夏畦者而未免為俗儒盡棄其平日之學此道之所以不明也至于甚者苟勢利于奔競之途馳嗜慾于紛華之境間有恃才傲物以招譏評刺口論事

以取中傷高談雄辯率嘗屈其座人以佞為才而致憎
浮薄嘲謔反希市人以狂為達而賈怨豈先聖所以教
人老師宿儒所以望于後生也哉非特學者之罪上之
人未有以導之也國家承平百年文物日富大駕南巡
命內外官舉可任縣令者又以六條定其殿最于是出
宰是邑乃廣宣聖之廟而新之殿其中央以安聖容旁
列兩廡以安賢像堂其後俾師講而生習之齋其左右
俾時習而日省之會魏侯邦彥以事過其邑請予為記

竊以商水故潏水在漢為淮陽郡名士出焉地靈物秀
何患無人昔文翁化蜀而蜀郡多文士常袞南遷而福
建多諸生況中州禮義之鄉輔以賢令明教之力將見
人才輩出曾行閱趨豈獨漢唐之舊哉

裕州學記

裕州故方城在漢隸淮陽或隸昌穎汝陰齊桓公楚屈
完憑軾之地裴晉公李愬經略之郊也俗剽悍而武輕
徙不地著其土風之然乎大駕南巡以其隣于唐鄧也


視為重地易邑為郡賓刺史正大二年以內族公某為之公明濟開豁仁而勇義一之曰庶而安之二之曰富而教之政成思有以大慰服其心惕然深維曰孔子聖人之大也自黃帝唐舜三代聖王皆不得常祀獨孔子以德自京師達于荒郡僻邑皆得以春秋奉祀事固自有次第哉禮有以舉之莫可廢也禮天子祭天地百神諸侯祀其境內山川否則有禁世遠道喪淫泆之祀遍天下而孔子之祀雖以時舉吏惰不虔備故事而已非

所以妥聖靈致崇極之意也自唐以來以十哲配列六十二賢于兩廡又圖二十四大儒于壁其後以孟子孫卿子楊子文中子韓子五賢祀于別室既列孟子曾子于堂而子思子傳中庸大學之道獨不得以配四賢乎若張平子之博識諸葛孔明之忠烈陳仲弓之德化皆吾近郡先賢之章著者也其可忽諸于是大敞宣聖廟而重新之禮殿講堂碩大且崇前三其門旁二其廡為夾室者二繪五賢于左續先賢于右列齋者四以為士

子絃誦之室會元帥完顏公以詩書之帥當熊虎之任
折衝尊俎諏經講道學之成也與有力焉廟成其從事
大原王渥鳩衆而言曰侯之牧是邦也不既休乎侯之
祀是廟也不既備乎音無詩歌以嘿侯之德是不接邦
人于道也使來請辭辭曰

有方者城 宛葉之間 蠢彼蠻荆 嗾凶嘯頑
帝命選侯 易邑而州 其撫爾民 徃分予憂
撫撫原隰 屹屹方城 我侯戾止 有年無兵

方城言言	原隰昫昫	我侯戾止	作新斯民
乃作新廟	新廟奕奕	載色載笑	匪督伊力
有歸其宮	楹且桷兮	有煥其容	丹且雘兮
望之巍如	入之肅如	有來士子	深衣襜如
湯湯汝水	乃洙乃泗	曾是一方	化為闕里
汝水湯湯	洙泗之鄉	曾是蟲賊	化為柔良
侯在在堂	左書右詩	化洽于體	仁漸于肌
此邦之休	惟公起之	毋俾數遺	尚或似之



淦水集卷十三

欽定四庫全書

集部

溢水集卷十四至
六

詳校官中書臣沈颺

主事臣呂雲棟覆勘

覆校官中書臣呂雲棟

校對官助教臣汪錫魁

謄錄監生臣謝景標

欽定四庫全書

淦水集卷十四

金 趙秉文 撰

論

總論

盡天下之道曰仁而已矣仁不足繼之以義世治之汙
隆系乎義之小大而其世數之久遠則係乎其仁所積
之有厚薄紀綱刑政皆由義出者也天下有道則大綱
小紀一出於正其次大綱正而小紀不正不害其為治

大綱不正小紀雖正不害其為亂所謂大綱風俗也人材也兵食也質勝華則治之原也華勝質則亂之端也國家之興未有不先實而後趨于華華之極則為奢為僭為姦為偽則日趨於亂矣天下不能無正人亦不能無邪人在人君所處之正勝邪則治之端也邪勝正則亂之端也邪勝極則為請託公行為讒妬並興則日趨于亂矣天下不可一日而無兵備亦不可一日而乏財用用之有道治之原也用之非道亂之端也二者之敝為

黷武為聚歛則日趋于亂矣天寶之末宣政之季病者有方孤獨者有養教養有官宮祠有秩亦可謂小制立矣然不免于亂亡凡以大綱不正故也自古帝王或寢以隆昌或僨而復振或斷而復續皆積之效也唐虞三代漢唐難以徧舉秦征伐六國未亡而秦先亡文景弑逆晉一傳而亡前人所謂秦如馬後牛呂氏非復嬴者是也梁武好佛而亡而餘孽復振至唐八葉宰相與之終始猶以慈儉也是故施之于智力可及之地者人也

施之于智力不可及之地者天也仁者天之道也義者人之事也人定者勝天天定亦能勝人孟子曰不仁而得天下者未之有也余獨曰不仁而得天下者亦有之矣不仁而世數長久者未之聞也或曰子之言世俗之言也曰固然也然古之人不求苟異其於仁義申重而已六經載唐虞三代之道遭秦煨燼其書不完漢魏以來學者講之詳矣苟為喋喋吾恐失之鑒也兩漢以來備有史記可覆而考也文帝有容天下之量宣帝有君

人之術然而不及三代者武帝之過也蜀先主有公天下之心唐文明二帝有追治古之風然皆有失足以為龜鏡矣或曰前輩之論英雄曰曹操劉裕苻堅其取天下或得或失子曾無一言及之何耶曰所貴乎中天地而應帝王者謂其為生靈之主也苟爭地以戰殺人盈野爭城以戰殺人盈城不顧逆順是生人之讐也予尚忍言之哉卒論如左傳之于家云

西漢論

漢高帝起布衣取天下當時比之逐鹿幸而得之然初入關中秋毫無犯約法三章此與發粟散財何異天下既定規模卓然已有四百年之氣象孝惠享國日淺呂氏盜執國柄勲戚環視莫敢誰何譬猶強族大姓采蕪并之力夫亡子幼主婦驚恐雖有豪奴悍婢猶且惕息伺一旦之隙餘威猶在耳孝文慈儉出於天性是時漢興二十餘年賈生遂欲改制度削諸侯繫外夷賴誼之策不行遂以無事使帝無賈生不失為守成之賢主而

帝盡行生之言其禍有不可勝言者大抵文帝德量過於賈生所不及者才具耳雖然以誼之才輔之可也疎之亦非也使誼加以數年不死亦自悔其前日之論則伊管之儔也及至孝景用晁錯之計七國遂反於斯之時有叛國無叛民後來到得武帝罷出百家表章六經脩郊祀改正朔作詩樂正音律駿駿乎三代之風使武帝遂相仲舒則三代矣或曰元朔之政多以仲舒發之然此皆三代之文仲舒之言曰人君正心以正朝廷又

曰仁人者止其誼不謀其利明其道不計其功凡此皆仲尼之心三代之實也使帝知正心明道之實亦自無末年之禍而帝甘心四夷奢侈無度亦豈果能用仲舒哉奈何乘文景之蓄積窮兵黷武征伐不休至于末年戶口減半幾及亡國所不亡者幸也或曰武帝開西域以斷匈奴右臂刷高帝平城之恥洗呂后嫚書之辱矯文帝姑息之敝筭計見効不亦不乎曰前不云乎不謀其利利之大者也不計其功功之大者也以帝之雄才

大略一遵文帝之慈儉又豈止延祚四百年而已哉是故帝王之過莫大乎好殺老子曰其事好還楚靈王曰予殺人子多矣能無及乎卒有戾園之禍賴高文思德在人心付託得人擁昭立宣遂以復安曰然則衛霍之將也非乎曰亦非也武帝非實知衛霍之才特以私衛后之親耳以李廣利征貳師准之可見自古帝王變亂舊章果于自用者自武帝始其與始皇相去無幾亡不亡之間耳及至孝宣知民事之艱難厲精為治有君人

之術然考其所謂以嚴致平者殆不可見夫信賞必罰
五帝三王不易之道但論其當與否耳必以誅趙廣漢
韓延壽等為嚴刑峻罰破姦宄之膽此自帝之過舉亦
非霸者之政矣惜哉亡是可也至其用趙克國破先零
論議諄復于屯田之計優優乎帝王之畧矣元成而下
無譏焉劉向揚雄皆經國之大儒吾知其不能用也

東漢論

善治病者必知脉之虛實病之大小治之逆從微者逆

之甚者從之寒熱通塞因之有時故疾未除更生它疾
參伍其宜徐以制之夫然後病可為也東漢自明章以
後其君不足與有為政出外戚孝和與鄭眾誅竇憲宦
官用事自此始此蓋如人受病之始雖飲食如故病留
於腠理而四肢未覺也迨至孝安納王聖焚豐之譖誅
楊震如人漸不甘魚肉之味而嗜土炭疾猶可為也明
年誅聖等是其效矣其後梁冀擅廢立唐衡左綰等用
事此亦平勃交驩之時也李杜二公少恐須臾帝必將

憤冀冀乃可圖已而單臣等果誅冀五侯復恣橫將有繼是而希進者此通因通用塞因塞用之理也終之陳竇繼誅黨禍起矣此病甚而不從之過也是後羣公欲盡誅內宦內宦既除而漢亦亡譬猶故病未除益以他疾其証已危當以飲食醫藥漸以治制之一用毒藥則大命去矣故毒藥十去六七者良為此也嘗謂西漢大臣寬博有謀可定大事然不及東漢士大夫之節故平勃霍光終成其功其敝也養交安祿而王莽以穿窬之

智坐懷神器東漢士大夫忠義有守足鎮頽俗然不及
西漢大臣之謀故李杜諸公以虛名相高而姦雄不敢
覬覦其敝也矯激太甚而身死國亡要之圖回天下者
豈淺淺丈夫之所為哉在易之蠱曰先甲三日後甲三
日說者曰甲為春仁也庚為秋義也蠱者物壞而有事
之時治蠱之道不可以亟也於卦一陽生為復二為臨
三為泰四為大壯五為夬夬決也以五陽而決一陰猶
戒之曰健而說決而和柔乘五剛也然則聖人之意亦

可見矣或曰然則仲尼隳三桓城也非耶曰史失其傳多矣家語雜出于後世王肅之學似非聖人之學謀也聖人之謀不如是之亟也哀公問社於宰我說者以為有行誅之意魯自宣公失國政在三桓久矣仲尼止之曰成事不說遂事不諫既往不咎誰謂仲尼為政朞月而遽肯隳三都乎易曰順而止之觀象也或曰然則李杜當梁冀廢立之際將為胡廣趙戒乎曰李杜正色立朝若經孔子當在三仁之列吾猶恨其正而寡謀也廣

戒順而不止李杜止而不順順而止之其平勃乎陳竇
諸賢猶裸袒而廁虎兕之齒也至則靡耳何功之有易
曰見惡人无咎子見南子佛肸公山弗擾召子欲往聖
人不絕惡人之辭陳實所以送張讓之葬也雖然有實
之心則可不然豈可見黃門而稱貞哉

魏晉正名論

甚哉桓靈之不君也其所為鈎黨者天下之善人舉在
焉善人國之紀也其可殺之乎善人誅鋤姦雄覬覦又

況鬼偷狐媚如搽者哉自後輕侮肆言如孔文舉者殺之勸讓九錫如孫文若者殺之豪傑既盡國亦隨之其餘恒怯諂附之徒舉社稷以與人而不羞也是時中原人物惟陳長文為第一然其魏室佐命之臣則漢室之所謂賊也搯王父之吭而奪之食資父以為孝凶逆不為誰謂長文而忍為之乎善乎歐陽子之言曰魏晉而下佐命之臣皆可貶絕謂其二心于本朝也遷固而下佐作史者何其蕩而無法也春秋書齊豹盜三叛人名

惡之也陳壽既以與陳羣之徒晉史遂以賈克弒君之賊列於晉傳之首何以史為哉若以春秋之法繩之陳羣賈克之徒當附于漢魏賊臣傳且書曰漢羣臣以帝禪於魏凡師能左右之曰以庶幾亂臣賊子知所懼矣以荀彧為魏傳首何則天下大亂羣雄競起撥亂之才非操而誰漢祿既盡俟天下悅然而歸已上則為周文王下不失為漢高光孰與攘九錫以篡終哉此或之志也以羊祜杜預為晉傳首至于王祥雖名孝友身為三

公無補國亡當附于王導傳首其餘機雲之徒當列於
文藝傳嵇阮之徒當列於玄虛傳王衍當國不營世務
職為亂階當附于奸臣傳王陵母邱儉諸葛誕等雖名
忠於本朝然興兵犯順以誅君側之惡其漸不可啓也
當書曰魏諸葛誕王凌母邱儉以廣陵叛猶冀其有存
魏之心故書曰魏若司馬師則無復魏矣阮籍登廣武
而嘆蓋有意乎正當世之亂也然為師等作九錫表名
魏而實晉矣當書曰晉阮籍登廣武而嘆春秋之法諸

侯即位未踰年稱子踰年則稱公廢弒二帝皆即位踰年而史稱仰陵厲公高貴鄉公此何理也正使賊臣不加尊謚猶當以廢帝及正元正始之號加之至於元皇帝為司馬炎篡奪託名禪讓加之謚號炎之篡魏之讐也使帝有靈其受仇讐之偽謚乎孔子曰必也正名名豈止而言豈順乎當書曰司馬師廢正始皇帝昭弒正元皇帝炎篡景元皇帝是後宋奪之晉齊奪之宋梁奪之齊皆託禪讓為名雖由天道好還亦其風俗有自來

然則名節之士可不重與可不重與

蜀漢正名論

仲尼編詩列王黍離于國風為其王室界弱下同於
列國也春秋諸侯用夷禮則夷之夷而進於中國則中
國之西蜀僻陋之國先主武侯有公天下之心宜稱曰
漢漢者公天下之言也自餘則否書漢中王立為帝者
何著自立也昭烈帝室之冑輔以諸葛公王者之佐乘
中原無主遂即尊位以係遠近之望宜矣然而猶有所

憾云者方蜀中傳言漢帝遇害縞素以令王軍曰曹操
父子逼主篡位吾奉密詔討賊義不與共戴天是時關
張熊虎之將猶在指揮中原以定大計漢主若在吾事
之不濟退以漢中王終身北面若亡危難之際非英武
不濟捨我其誰哉上則為三王之舉下不失為漢光武
孰與曹丕孫權同以僭稱哉書蜀攻吳攻于夷陵蜀師
敗績者何吳蜀唇齒之國人皆知蜀攻吳之非不知吳
之非不知吳謀侯之亦非也使吳蜀相持而劉曄之計

得行吳其殆哉勝敗不足論也先主於關侯情義久要
義當復讐不慮其敗然聞諸葛瑾之言關侯之親何如
先帝俱應仇疾誰當先後忿恨之心亦可已矣而不能
已余然後知克己之為難也書漢主命丞相亮輔太子
禪者何古之所謂誠其意者毋自欺也三代而上正心
誠意以之治天下國家無餘事矣觀先主所以付託孔
明之意三代而下公天下之心者至此復見伊湯之德
不足進焉或曰誠固天德其如人偽何曹氏父子所以

付託司馬懿者亦已至矣而卒以篡奪果在推誠哉曰
曹氏欺孤問鼎何嘗一事而出於誠使有孔明不為用
也至於託孤曰爾無負我庸愚知笑之豈與先主武侯
同哉夫仁人者正其義不謀其利徃以義者來以義徃
以利者來以利義利之判久矣曰然則先主借荊州逐
劉璋果皆出于誠乎曰使先主一出於扶漢此亦無弱
侮亡之道惟其不忍須臾以即尊位使人不能無恨噫
安得王者之佐與之共言至公哉書漢丞相亮討孟獲

七擒縱者何昔舜舞干羽于兩階七旬有苗格學者或疑焉此古帝王正義明道之事固非淺淺者所能議也有苗雖為逆命又非冥頑無知者其意曰以位則彼君也我臣也以力則彼以天下我以一方也而且退讓修德其待我也亦至矣且孔明所以不殺孟獲者服其心也孔明而一天下其待孟獲也又必有道矣惜乎出師中道而歿不得見帝者之佐之行事故功業止此齟齬也善乎文中子曰諸葛亮而無死禮樂其有興乎僕固不

足以知禮樂之本若安上治民移風易俗之實孔明任之有餘矣不然周旋鏗鏘之末區區叔孫通大樂令夔之事何待於亮哉

唐論

唐興承五代干戈之後生民憔悴思樂息肩幸而貞觀之治同符三代然猶好大喜功遼東之役未已而武氏已殲其宮中矣唐之子孫殺戮殆盡雖致治之美有以開三百年之業然猶不能贖樂殺人之禍也中睿懦弱庸

開元致治同符貞觀至天寶之亂唐興百五十載物極則衰理勢然也然開元之末一日殺三庶人則天理滅矣罷張九齡相牛李則狗冠廟堂矣內則妖姬蠱惑外則國忠嘯凶則狐穴城社矣向不任蕃將討奚契丹屠石堡城誅南詔使生靈之血塗於邊草雖有末年之禍不如是之酷也以至骨月流夷哀王孫之詩是也妃嬪戮辱哀江頭之詩是也以其所不愛及其所愛向無李郭之將社稷墟矣孟子曰民為貴社稷次之而使生靈

塗炭社稷陷危託于人上安之乎在昔殷周之賢王超
然如山林學道之士視聲色富貴不足以繫其心故能
長保其富貴尊安六七百歲而不絕後世之君貪一餉
之樂遺百年之患以彼校此誰得誰失然猶覆轍相尋
豈不哀哉或者以為禍始於妃后成于宦豎終於藩鎮
向使明皇無侈大之心則妃匹宦豎之禍不作祿山一
牧羯奴耳藩鎮之禍何由而興終之姑息政行禍難繁
興雖元和平蜀蔡會昌定晉潞終不能得山東尺寸之

坐而使務勝不休則為黷武矣譬之中年之後一下一
衰亦其理也加之肅代有一顏真卿而不能用德朝有
一陸贄而不能用宣朝有一李德裕而不能用自是以
還唐衰矣或曰前人王令曾鞏論過唐曰不法三代子
何論之卑也曰此書生好大之言也貞觀開元以仁義
治天下亦三代之遺意也子以不封建不足以為三代
乎藩鎮之召亂不得已也況得已而封建乎子以不井
田不足以為三代乎宇文融括隱田而天下怨況奪富

以資貧乎曰非此之謂也謂禮樂法度闕如也曰禮樂
法度亦各隨時之制子以為必如周公之制而後可是
後世無復三代矣房杜姚宋不能知制作之本而謂王
令曾鞏必能知之乎是又王安石也曰然則先王之
制治其終不可見乎曰以仁義刑政治天下略法唐虞
三代參以後王之制其可矣如其禮樂以俟明哲

知人論

天下之患莫大於有間小人者因其間之可入投巖抵

罅無所不至其始也僥倖於一切之利而不圖後患而
其末也至於國家覆敗而不可支持未嘗不本乎小人
之為患也甚矣小人之為患難知知而難去也其所謂
小人者又非其貪如盜跖賊如商臣讒如惡來汰如樂
厲之為難也譬如猛虎獬犬人得執而殺之矣其要在
乎小慧似智矯諫似忠趨趨盤辟以為敬內厚情深以
為重見小利而不圖大患邀近效而不知遠慮主有所
向而遂其惡而先之主有所惡則射其怒而遷之其詐

足以固人主之寵其信足以結人主之知漢張禹胡廣
晉孫勗唐盧李之徒是已孔子曰鄙夫可與事君也與
哉其未得之也患得之既得之也患失之苟患失之無
所不至矣夫患得患失之徒苟生利之為見以為事固
當然無足慮者豈知禍敗一至此哉譬之少年酣聲色
以蠱其心至其暮齒八邪攻其外百疾伺於前則不免
餌金石之過以駐須臾之期則疽癰者日相繼也人皆
知金石之過而不知酒色之蠱其先也故賊莽之篡內

宦之專八王之亂安史之禍金石之潰也數子之甘言
酒色之咎也人之適意常在耳目之前而遺患常在于
數十年之後求其危於後患也難矣哉然則何以知小
人而君子曰難言也雖然試言其畧小人不知大體而
寡小過苟得苟合易進而難退君子知大體而不免小
過不苟得不苟合難進而易退人主者救君子之小過
而不怵于小人之寡過以責其遠者大者其亦庶乎其
可也

遷都論

東坡有言周室之壞未有如東遷之謬者也僕則以為不然使平王不遷亦不能朝諸侯而撫四夷矣幾何其不胥而為夷也事有緩急勢有強弱魏武之遷許昌固不如圖關侯之易也東晉之竄蠻越又不如守建康之舊也不幸夷狄亂華外侮內訌師老而緩急難支財殫而餽運不繼何恃而不遷哉大抵有天下者安必慮危治必防亂所以長安且治後世安諱危治諱亂所以愈

危且亂也昔者周都豐鎬而周公定鼎於洛邑蓋有深
意存焉其後或設東西都或寘陪京雖以備巡幸耳亦
所以防不虞之患也使其於治安之時未嘗有意外之
慮不幸一旦當遷其如危弱何曰固也不遷愈危且弱
矣雖然揀之之術有形有勢有本明皇幸蜀晉遷金陵
恃江山險阻形也周之東遷晉鄭焉依恃諸侯強大勢
也向使無江山險阻與諸侯之勢則亦固其本矣上京
中都國家之根本也議者或遷河南或遷陝西不過恃

潼關大河之險耳而夏人偵吾西宋人偵吾南萬一蜂
蠆有毒窺吾間隙則關河之險為不足恃况大河為限
則舉根本之地似為棄之可乎故愚以謂莫若權幸山
東山東富庶甲天下杜牧所謂王不得不王霸不得不
霸又利建漢道可以通遼東兵運直接上京開黃河故
道由滄景而入海則是河南山東為一大河險阻共之
也有關河之形固上京中都之本而輔之以建侯之勢
一舉而三者得其與遷河南陝西不侔矣

侯守論

或問建侯置守孰為得曰皆是也抑皆非也何以言之
曰三代封建則守在四夷而其敝也有尾大不掉之患
秦罷侯置守則制在一人而其衰也有天下土崩之勢
此天下之所睹聞也或者懲尾大之咎謂郡縣不必稽
於古鑒土崩之失謂封建可復行於今二者皆一偏之
弊未知所以救之之術也且法不能無弊弊不能無變
三代之法弊而郡縣之郡縣之法弊而不思所以復之

之術為得乎夫立國必有一家之制度制度必有所法
列郡縣隳名城銷鋒鏑非秦之法耶秦之法弊而不以
三代之法救之亦不為善變矣夫平居致養拔一毛以
事無用壯夫不為也及虺蛇之螫斷一臂以去所患怯
夫為之何則所損者小而所利者大也方天下已定上
有一尊下無異望當此之時復欲幅裂山河而瓜分之
建侯樹屏使諸侯世擅其地私有其民調其兵車入其
財賦使更為肘腋互為唇齒生靈之患何時而息耶此

拔一毛以事無用也故其勢不得不郡縣及太平日久
內弛外訌夷狄肆侮社稷阡危人主有睽孤之勢海內
無勤王之師此斷一臂以去所患也故其勢不得不封
建昔者議天寶之亂房琯請割州郡以封諸子祿山聞
之曰天下非吾有也既而太子沮之其議遂寢自後藩
鎮跋扈或治或亂然且垂百五十年亦藩鎮相維之力
也不得已而封建其利有三諸侯世擅其地則各愛其
民愛其民則軍不分修其城郭備其器械則人自為戰

人自為戰則我衆彼寡夷狄不能交侵一也夷狄無外侮則天下終為我有二也雖有強獷之徒大小相維足以長世三也或曰亡國之難八王之禍皆封建為之也子尚忍言之乎曰吾之所言非謂郡縣不及封建也為救敝不得已而言之也且郡縣之治可以大治亦可大亂封建之制不可大治亦卒不至大亂人主權其輕重可也况罷侯置守非大亂之後不可卒變封建子弟非罷侯寘守之難也何憚而不為哉

直論

傳曰正直為德詩曰靖共爾位好是正直神之聽之介爾景福則直之為德且祥也明矣何以明之人心莫不好直而惡曲其反是者有物蔽焉耳貪者怵于利而怯者避其禍嘗試與之論人物評曲直應非而是者必其親且厚也不然其權勢足畏也應是而非者必其疎且怨也不然其勢位足卑也自餘議論無不公者弗與同其利也弗與同其害也則勇者必見於言懦者必見

于色應非而是應是而非者否焉耳然則直之為德且
祥也亦明矣然多有以直賈祿者古之人守道以為直
後世徼名以近禍也吾非其父兄也非其師友也吾直
焉此被髮纓冠而救鄉人之關也親則父兄也義則師
友也吾不直焉此端坐而視同舍之焚溺也其可乎是
故言有當於分行有合於理吾直焉是直也吾守道也
言有犯于分行有乖于理吾直焉非直也徼名也故道
之所在直之所在也守其道而名從之名之所在利之

所在也志於利而害亦從之直之名一而其別有四有直而陷於曲者有曲以全其直者有直而過於直者有直以遂其直者其父攘羊而子證之此直而陷于曲者也魯昭公娶於吳孔子以為知禮此曲以全其直者也國武子以盡言見殺洩治以諫死此直而過于直者也齊魯之會孔子歷階而進齊梁之見孟子不肯枉尺而直尋此直以遂其直者也可以辨是非而知所擇矣或曰君子不直焉其可乎曰未也食其食任其責君子殺

身以直馬可也吾非衆之首衆非吾必從君子完其力
而已所貴君子者動靜語嘿不離其道者也

淦水集卷十四